

Proklamasyon ng Gobernador para sa Sakuna

SAPAGKAT, noong Agosto 31, 2022, nagsimulang tumanggap ang Estado ng Illinois at Lungsod ng Chicago, nang walang anumang abiso, ng mga bus na ipinadala ng Estado ng Texas, na naghahatid sa mga indibidwal at pamilya mula sa Gitna at Timog Amerika na naghahanap ng asylum sa Estados Unidos; at,

SAPAGKAT, sa pagitan ng Agosto 31, 2022 at Nobyembre 8, 2024, mahigit limampung libong indibidwal at pamilyang naghahanap ng asylum ang dumating sa Chicago at iba pang mga lungsod ng Illinois na wala o walang sapat na abiso; at,

SAPAGKAT, inaasahan na ang mga indibidwal at pamilyang naghahanap ng asylum ay patuloy na ihahatid sa Illinois, sa tulong ng Texas, at potensiyal na iba pang mga estado, at kakailanganin ng Estado at mga lokal na katuwang na patuloy na magtulungan para direkta at hindi direktang magpondo at/o magbigay ng mga kinakailangang serbisyo, kabilang ang, ngunit hindi limitado sa, pagsuporta sa kapasidad ng shelter, transisyon sa isang sistema ng shelter, pamamahala sa kaso ng resettlement, at permanenteng pabahay; at,

SAPAGKAT, ang Illinois ay bukas na estado, na matagal nang pinayayaman at itinataguyod ng umuunlad na komunidad ng mga migrante, at nag-resettle ng mahigit 125,000 refugee mula sa mahigit 60 bansa mula noong 1975; at,

SAPAGKAT, ang mga ahensiya ng Estado, sa pakikipag-ugnayan ng Lungsod ng Chicago at iba pang lokal na pamahalaan, ay patuloy na kumikilos para matiyak na ang mga indibidwal at pamilyang dumarating sa Illinois ay nakakatanggap ng kailangan nilang tulong, para protektahan ang kanilang kapakanan at ang pangkalahatang kapakanan ng Estado ng Illinois at ng mga residente nito; at,

SAPAGKAT, ang mga pamilya at indibidwal na dumating sa Illinois na naghahanap ng asylum ay nangangailangan ng espesipiko at agarang suporta, kabilang ang pansamantalang matutuluyan at pabahay; pagkain; mga pagsusuri sa kalusugan, pagsusuring medikal, at paggagamot; mga serbisyo sa case management para matulungan sila sa pagtugon sa mga kritikal na pangangailangan (kabilang ang mga serbisyong legal at suporta sa kahandaan sa trabaho) at mga benepisyo (na maaaring kabilang ang mga benepisyo sa Mga Biktima ng Trafficking, Torture, at Iba Pang Malubhang Krimen (VTTC), sa ilalim ng Batas sa Karahasan sa mga Babae, at/o ang

Batas sa mga Biktima ng Krimen); at pagpasok sa mga pampublikong paaralan; at pangmatagalang pabahay at tulong sa pabahay; at,

SAPAGKAT, ang mga pamilya at indibidwal na ito ay dumarating pagkatapos ng napakahaba at mahirap na paglalakbay mula sa kanilang mga tahanan, marami sa kanila ay nangangailangan din ng pangangalagang medikal, kabilang ang pangangalaga bago manganak para sa mga buntis; paggamot sa malnutrisyon, dehydration, at hika sa mga bata; pinsala sa paa at pangangalaga sa sugat; pagbabakuna; at pamamahala sa kronikong kondisyon ng kalusugan. Marami sa mga matanda, bata, at sanggol na dumarating sa Illinois ay nangangailangan din ng mga pagsusuri at pangangalaga sa kalusugan ng isip para magsimulang makabangon mula sa trauma na naranasan sa kanilang paglalakbay; at,

SAPAGKAT, ang Estado ng Illinois at maraming lokal na pamahalaan sa buong Estado ay regular na nakikibahagi sa pagpapalano para matiyak ang sapat na kapasidad para matugunan ang mga pangangailangan ng mga bulnerableng populasyon, kabilang ang mga pamilya at indibidwal na naghahanap ng kanlungan o asylum sa Estados Unidos; at,

SAPAGKAT, ang mga pamilya at indibidwal na naghahanap ng asylum ay dumarating sa Illinois nang walang paunang abiso kung kailan sila darating at nang walang koordinasyon sa Estado ng Illinois o sa Lungsod ng Chicago, kaya kailangan ang proklamasyong ito; at,

SAPAGKAT, ang Estado ng Illinois at mga lokal na pamahalaan ay patuloy na kumikilos para matugunan ang mga pangangailangan ng mga pamilya at indibidwal na naghahanap ng asylum, parehong direkta at sa pamamagitan ng masinsinang pakikipag-ugnayan sa mga organisasyong di-pampamahalaan at mga boluntaryo; at,

SAPAGKAT, ang normal na kapasidad para magbigay ng lahat ng kinakailangang serbisyo para sa kalusugan at kapakanan ng mga bulnerableng pamilya at indibidwal na ito ay lubhang nalampasan na, at kinakailangan ang agaran at patuloy na mga hakbang upang mapanatili ang mas malaking kapasidad na kinakailangan upang matugunan ang mga pangangailangan ng kasalukuyang mga pamilya at indibidwal na naghahanap ng asylum; at,

SAPAGKAT, kung walang agaran at patuloy na pagkilos, magkakaroon ng kakulangan sa kapasidad sa mga kritikal na serbisyo, kabilang ang panandalian, pansamantala, at pangmatagalang tirahan at pabahay para sa mga pamilya at indibidwal na naghahanap ng asylum; mga pangkalahatang serbisyo tulad ng pagkain, pangangalaga sa kalusugan, legal na adbokasiya, at suporta sa kahandaan sa trabaho; mga kawani ng pamamahala ng kaso para makatulong sa pagkuha ng iba pang mga kinakailangang serbisyo; at operasyonal na staffing na kinakailangan sa lahat ng antas para maibigay ang mga serbisyong ito; at,

SAPAGKAT, may dumarating na mga bagong indibidwal at pamilya na naghahanap ng asylum sa Illinois, para patuloy na matugunan ang lubhang tumaas na pangangailangan sa pansamantalang matutuluyan at pabahay, gayundin sa mga tauhan at serbisyo, at para patuloy na maagapan ang banta sa kalusugan, kaligtasan, at kapakanan ng mga pamilya at indibidwal at komunidad na naghahanap ng asylum, ang Estado ay dapat na agarang kumuha at magpanatili ng nakakontraang tulong, na nangangailangan ng paggamit ng kapangyarihang pang-emerhensiya ng Gobernador; at,

SAPAGKAT, ang mga hakbang na pang-emerhensiya ay kailangan upang patuloy na maglaan ng mga tauhan sa pagsisikap ng iba't ibang ahensiya at iba't ibang pamahalaan na kinakailangan para matugunan itong nagbabagong sitwasyon habang tinitiyak na hindi naaantala ang mga kritikal na serbisyo sa mga kasalukuyang residente ng Illinois; at,

SAPAGKAT, ang mga pangyayari sa kasalukuyang sitwasyon ay nagdudulot ng banta sa kalusugan, kaligtasan, at kapakanan ng mga bulnerableng pamilya at indibidwal na ito at sa Estado, nangangailangan ng agarang pagkilos, at maituturing na isang sakuna gaya ng nabanggit sa Seksiyon 4 ng Illinois Emergency Management Agency Act na nangangailangan ng pang-emerhensiyang pagkilos ng Estado; at,

SAPAGKAT, dahil sa banta sa kalusugan, kaligtasan, at kapakanan na dulot ng mga pangyayaring ito, idineklara ko ang lahat ng county sa Estado ng Illinois bilang lugar ng sakuna bawat buwan simula Setyembre 2022; at,

SAPAGKAT, patakaran ng Estado ng Illinois na magiging handa ang Estado sa pagtugon sa anumang mga sakuna at, samakatuwid, kinakailangan at angkop na magbahagi ng mga karagdagang rekurso ng Estado para matiyak ang kalusugan, kaligtasan, at kapakanan ng publiko; at,

SAPAGKAT, may legal na batayan ang mga kondisyong ito sa ilalim ng Seksiyon 7 ng Illinois Emergency Management Agency Act para sa pagpapalabas ng isang proklamasyon ng sakuna; at

SAPAGKAT, nakasaad sa Konstitusyon ng Illinois, sa Artikulo V, Seksiyon 8, na “taglay ng Gobernador ang pinakamataas na kapangyarihang tagapagpaganap, at pananagutan niya ang tapat na pagpapatupad ng mga batas,” at ipinahahayag, sa Preamble, na pangunahing layunin ng Konstitusyon ng Illinois ang “paglaan para sa kalusugan, kaligtasan, at kapakanan ng mga tao”;

DAHIL DITO, sa interes na matulungan ang mga mamamayan ng Illinois at ang mga lokal na pamahalaan na responsable sa pagtiyak ng kalusugan, kaligtasan, at kapakanan ng publiko, ako, si JB Pritzker, Gobernador ng Estado ng Illinois, ay ipinahahayag ang sumusunod:

Seksiyon 1. Alinsunod sa mga probisyon ng Seksiyon 7 ng Illinois Emergency Management Agency Act, 20 ILCS 3305/7, pinatutunayan kong may sakuna sa Estado ng Illinois at idinedeklara ang lahat ng county sa estado bilang lugar ng sakuna. Pinahihintulutan ng proklamasyon ang paggamit ng lahat ng kapangyarihang pang-emerhensiya alinsunod sa Seksiyon 7 ng Illinois Emergency Management Agency Act, 20 ILCS 3305/7, kabilang ang ngunit hindi limitado sa mga partikular na kapangyarihang pang-emerhensiya na nakasaad sa ibaba.

Seksiyon 2. Sa paninilbihan ng Illinois Department of Human Services bilang nangungunang ahensiya, ang mga ahensiya ng Estado, kabilang ang ngunit hindi limitado sa mga nakalista sa ibaba, ay inaatasang patuloy na makipagtulungan sa Gobernador, gayundin sa iba pang ahensiya ng Estado, lokal na awtoridad, at sa Illinois State Board of Education, at patuloy na makipag-ugnayan sa isa’t isa patungkol sa pagbuo at pagpapatupad ng mga estratehiya at plano para sa pagtugon sa mga epekto ng kasalukuyang sitwasyon, kabilang ang pagtugon sa mga pangangailangan ng mga naghahanap ng asylum na pumupunta sa Illinois: ang Illinois Department of Human Services (na kinabibilangan ng Bureau of Refugee and Immigrant Services, ng Office of Hispanic and Latino Affairs, mga Welcoming Center, at nagpapatrabaho sa State Refugee Coordinator at State Chief Homelessness Officer); ang Illinois Department of Public Health (na nagpapatrabaho sa State Refugee Health Coordinator); ang Illinois Emergency Management Agency at Office of Homeland Security; ang Illinois Department of Central Management Services; ang Illinois Department of Labor; at ang Illinois Department of Healthcare at Family Services.

Seksiyon 3. Inaatasan ang Illinois Emergency Management Agency at Office of Homeland Security na ipagpatuloy ang pagsasagawa ng State Emergency Operations Plan at koordinasyon ng mga rekurso ng Estado para matulungan ang mga ahensiya ng Estado at mga lokal na pamahalaan sa mga operasyon sa pagtugon at pagbangon mula sa sakuna.

Seksiyon 4. Para makatulong sa agarang pagbili ng mga kinakailangan sa pagtugon at iba pang kapangyarihang pang-emerhensiya sa ilalim ng Illinois Emergency Management Agency Act, ang mga probisyon ng Illinois Procurement Code at ng Illinois Governmental Joint Purchasing Act na sa anumang paraan ay pipigil, hahadlang o mag-aantala sa kinakailangang pagkilos sa pagharap sa sakuna ay sinususpende hanggang hindi ito hinihingi ng pederal na batas. Para makatulong sa emerhensiyang grant-making na kinakailangan sa pagtugon at iba pang kapangyarihang pang-emerhensiya sa ilalim ng Illinois Emergency Management Agency Act, ang mga probisyon ng Grant Accountability and Transparency Act at ng Illinois Administrative Code na nagpapatupad nito, na humihiling sa mga ahensiya ng Estado na maglathala ng notice of funding opportunity (NOFO) at magsagawa ng rebyu ng nakabatay sa merit na aplikasyon at na sa anumang paraan ay pipigil, hahadlang o mag-aantala sa kinakailangang pagkilos sa pagharap sa sakuna, ay sinususpende hanggang hindi ito hinihingi ng pederal na batas. Nananatiling may bisa ang natitirang mga probisyon ng Grant Accountability and Transparency Act. Kung kinakailangan, at alinsunod sa Seksiyon 7(1) ng Illinois Emergency Management Agency Act, 20 ILCS 3305/7(1), ang Gobernador ay maaaring magsagawa ng angkop na ehekutibong aksiyon na nagsusupinde sa mga karagdagang batas, kautusan, tuntunin, at regulasyon.

Seksiyon 5. Alinsunod sa Seksiyon 7(3) ng Illinois Emergency Management Agency Act, 20 ILCS 3305/7(3), pinagagana ng proklamasyong ito ang awtoridad ng Gobernador, kung kinakailangan, na ilipat ang direksyon, tauhan o tungkulin ng mga departamento at ahensiya ng Estado o mga yunit nito para maisagawa o maitaguyod ang mga programa sa pagtugon sa emerhensiya.

Seksiyon 6. Alinsunod sa Seksiyon 7(10) ng Illinois Emergency Management Agency Act, 20 ILCS 3305/7(10), pinagagana ng proklamasyong ito ang awtoridad ng Gobernador, kung kinakailangan, para gumawa ng probisyon para sa pagkakaroon at paggamit ng pansamantalang pang-emerhensiyang pabahay.

Seksiyon 7. Mapapadali ng proklamasyong ito ang paghiling sa pederal na tulong para sa kalamidad kung nakasaad sa kompleto at komprehensibong pagsusuri ng pinsala na ang epektibong muling pagbangon ay lampas sa mga kakayahan ng Estado at ng mga apektadong lokal na pamahalaan.

Seksiyon 8. Ang proklamasyong ito ay kaagad na ipatutupad at mananatiling may bisa sa loob ng 30 araw.

JB Pritzker
Gobernador

Petsa: Nobyembre 8, 2024